

李広成蹊

前漢李広隴西成紀人。世世受射法。武帝時拜右北平太守。匈奴号曰漢飛將軍避之、數歲不入界。広出獵、見草中石以為虎而射之。中石没矢。視之石也。他日射終不能入。広経七郡太守、前後四十余年、得賞賜、輒分其戯下。飲食与士卒共之。寬緩不苛。士樂為用。元狩中為前將軍、從大將軍衛青擊匈奴、惑失道。青欲上書報天子失軍曲折。長史責広、之幕府上簿。広謂其麾下曰、「広

結髮與匈奴大小七十餘戰。今又迷失道。豈非天哉。且庠年六十餘、不能復對刀筆吏矣。」遂引刀自剄。百姓聞之知與不知、老壯皆為垂泣。

贊曰、「李將軍恂恂如鄙人。口不能出辭。及死之日、天下知與不知、皆為流涕。彼其中心、誠信於士大夫也。諺曰、「桃李不言、下自成蹊。」此言雖小、可以喻大。」